

## PN aprova proposta OJE 2021 iha jeneralidade



**DILI, 02 dezembru 2020 (TATOLI)**—Parlamentu Nasionál (PN), kuarta ne'e aprova ona proposta-lei Orsamentu Jerál Estadu (OJE) ho montante biliaun \$1.895 ba tinan 2021 iha faze jeneralidade.

Parlamentu Nasionál halo diskusaun no halo aprovasaun ba proposta-lei nº 23/V(3<sup>a</sup>) kona-ba Orsamentu Jerál Estadu 2021. Proposta-lei ne'e aprova ho rezultadu votasaun a-favór 44, kontra o no abstensaun o. Purtantu bankada deside *walk out* hosi plenaria Parlamentu Nasional.

“Ho nune’ e proposta lei nº 23/V(3<sup>a</sup>) kona-ba Orsamentu Jerál Estadu 2021 aprovadu iha jeneralidade, faze tuir mai sei iha espesialidade iha loron 4 dezembru 2020,” Prezidente Parlamentu Nasionál, Deputadu Aniceto Longuinhos Guterres Lopes, anunsia liuhosi plenária Parlamentu Nasionál, kuarta ne'e.

Proposta OJE 2021 hamutuk biliaun \$1.895 komposta hosi saláriu no vensimentu millaun \$239,26, bens (sasán) no servisu millaun \$421,49, transferénsia pública millaun \$669,91, kapitál minór millaun \$61,14 no kapitál dezenvolvimentu millaun \$503,20.

Hosi montante biliaun \$1.895 ne'e koloka ba prioridade sira hanesan bem-estar sosiál, protesaun sosiál no sidadania \$645,180,926 (35.9%), investe iha ekonomia no finansa pública nasaun nian \$374,622,063 (20.8%).

Nune’ e mós mellora konetividade nasional \$546,181,052 (30.4%), konsolidasaun no fortaleimento ba defeza, seguransa no relasaun externa \$158,830,873 (8.8%) no konsolidasaun no fortaleimento iha área justisa, demokrasia no direitu umanu \$72,428,398 (4.0%).

Xefe Bankada FRETILIN, Deputadu Francisco Miranda Branco, hateten durante ne'e Estadu moris ho rejime duodesimál ne'ebé provoka resesaun ekonomia Timor-Leste.

“Governu sira uluk halo Timor-Leste depende makaas ba sasán esportasaun tanba ne'e orsamentu biliaun \$1.895 hanesan raan no isin estadu nian hodi hadi'a hikas servisu efikaz no eficiente liu, hodi rezolve joven sira iha merkadu, dezenvolve setór kooperativa no promove dezenvolvimentu sustentável,” Xefe Bankada FRETILIN hateten.

Xefe Bankada FRETILIN ne'e lakoi Timor-Leste depende ba fundu minarai maibé presiza alternativu hodi substitui fundu soberania ne'e.

Bankada FRETILIN husu deputadu sira atu kuda kultura diálogu iha uma fukun Parlamentu Nasionál, tantu opozisaun no bankada Governu nian.

Vise-Xefe Bankada CNRT, Deputadu Patrocínio Fernandes dos Reis, seidauk rekoñese ezisténsia Governu nian tanba loloos ne'e forma Governu foun.

“Bazea ba istória kapasidade ezekusaun mak biliaun \$1.2 no biliaun \$1.4 la’ós biliaun \$1.9. Ho Dotasaun Orsamentu Temporáriu de’it mós foin ezekuta 60%, Governu ida-ne’e hakarak fahe osan ba malu de’it, OJE 2021 aloka osan boot liu iha bens servisu, nusá mak la tau boot liu iha kapítál dezenvolvimentu. Ami sei hola desizaun nonook iha toma desizaun iha OJE 2021,” Xefe Bankada CNRT ne'e hateten.

Bankada CNRT konkorda investe iha setór produtivu sira hanesan agrikultura, turizmu no setór importante sira seluk.

Xefe Bankada PD, Deputadu António da Conceição, apresia tanba orsamentu ne'e mai ho orsamentu kada programa.

“Bankada PD apresia diskursu Primeiru Ministru Taur Ruak nian ne'ebé rekoñese progresu Governu nian, OJE 2021 ne'e sei fó hikas esperansa ba povu hanesan estrada, bee-moos no reforsa hikas ita-nia setór privadu sira,” Xefe Bankada Partidu Demokrátku ne'e dehan.

Bankada PD husu deputadu sira hotu promove debate, nune'e tenke fó respeita ba líder hotu-hotu. Bankada PD fó hanoin atu orsamentu ida-ne'e responde duni povu ninia nesesidade hanesan eletrisidade nune'e povu hotu sente naroman ba ukun rasik-aan.

Reprezentante Bankada PLP, Deputadu Noé da Silva, apresia ho VIII Governu Konstitutionál ne'ebé konsege orsamentu ida-ne'ebe iha estraordináriu.

“Ne'ebé iha komitmentu apresenta orsamentu ida-ne'e ho baze orsamentu kada programa hanesan bem-estar sosiál, protesaun sosiál no sidadania, investe iha ekonomia no finansa pública nasaun nian, mellora konetividade nasional, konsolidasaun no fortalecimento ba defesa, seguransa no relasaun esterna no konsolidasaun no fortalecimento iha área justisa, demokrasia no direitu umanu. Ita fiar katak orsamentu ida-ne'e sei liberta povu hosi kiak no mukit,” deklarasaun políтика bankada PLP haktuir.

Xefe Bankada KHUNTO, Deputada Olinda Guterres, espera orsamentu ida-ne'e bele responde problema áqua no saneamento.

“Orsamentu ida-ne'e sei hasa'e kresmentu ekonomia, mellora konetividade hanesan kabu submarinu ne'ebé sai mós investimento boot hodi hasa'e mós kresmentu ekonomia,” Xefe Bankada KHUNTO hateten.

Xefe Bankada PUDD, Deputadu António de Sá Benevides, konsidera proposta-lei OJE 2021 prenxe rekezitu legal no konstitutionál.

“Bankada PUDD sei votu a-favór ba orsamentu ida-ne'e,” Xefe Bankada PUDD ne'e haktuir.

Nune'e mós Xefe Bankada Frente-Mudança, Deputada Isabel Freitas Ximenes, husu Governu prioritiza setór saúde, áqua no saneamento no kria política di'ak ba setór privadu sira.

“Orsamentu ne'ebé ambisiozu iha tempu estraordináriu. Ami hein katak sei implementa ho didi'ak, ami sei fó ami-nia apoia maibé presiza fó prioridade mak problema sira iha setór saúde hodi aumenta alokasaun ba setór saúde, presiza halo kontrolu ba membru Governu hodi implementa programa ho kualidade,” Xefe Bankada Frente-Mudança ne'e dehan.

Nia husu Governu atu tau atensaun ba áqua no saneamento, liiliu bee-moos ne'ebé komunidade enfrenta tanba durante ne'e problema boot mak bee-moos.

Iha fatin hanesan Xefe Bankada UDT, Deputadu Francisco David Xavier Carlos, apresia ho montante orsamentu ne'ebé Governu propoin maibé orsamentu kada tinan kontinua halo levantamento hosi fundu minarai.

“Maibé importante mak responde nesesidade povu nian tanba povu mak ohin loron ita harii nasaun ida-ne'e,” Xefe Bankada UDT hateten.